

Kekchi - Qach'ool Santil Hu - Comfort Scriptures

2 Corintios 1:2-4 Li usilal ut li tuqtuukilal nachalk rik'in li Yos li qaYuwa' ut rik'in li Qaawa' Jesukriist, chiwanq taxaq eerik'in. 3 Usilaatinanb'ilaq taxaq li Yos ut xYuwa' li Qaawa' Jesukriist, xb'aan naq a'an li Yuwa'b'ej aj uxtaan ut li Yos q'axal aj k'ojob'anel ch'oolej. 4 A'an nak'ojob'ank qach'ool sa' chixjunil li qarahilal re naq tooruuj xk'ojob'ankil xch'ooleb' li wankeb' sa' chixjunil li rahilal, rik'in li xk'ojob'ankil qach'ool li naqak'ul rik'in li Yos.

Proverbios 15:13 Li sahil ch'oolej ut li rahil ch'oolej nak'utunk chi xnaq' uhej.

1 Reyes 8:66 Sa' xwaqxaaq li kutan laj Salomón kixchaq'rab'iheb' li tenamit, ut eb' a'in ke'rosob'tesi li awab'ej ut ke'sutq'iik sa' rochocheb' chi k'ajo' xsahilaleb' xch'ool xb'aan chixjunil li usilal kixb'aanu li Qaawa' re laj David laj k'anjal chiru ut cho'q re Israel li xtenamit.

1 Crónicas 16:10 Chenimaaq eeru rik'in li xk'ab'a', che'saho'q sa' xch'ool jo'k'ihaleb' neke'sik'ok re li Qaawa'.

Proverbios 12:25 Li rahil ch'oolej naxluktesi xch'ool li winq; a'ut li chaab'il aatin naxsahob'resi.

Proverbios 13:12 Li ink'a' naxk'ul li k'aru naroyb'eni, naraho'k xch'ool. Ab'an k'ajo' li sahil ch'oolej naq naqak'ul li qoyb'enihom!

Isaías 30:26 Toja' naq li xsaqenkil li po taalemtz'uno'q jo' li saq'e tuqtu wa'leb', ut li xsaqenkil li saq'e taalemtz'uno'q wuqub' sut chik jo' xsaqenkil li wuqub' kutan, naq li Qaawa' tixk'irtasi ut tixlan li xtiq'ilal li xtenamit.

Oseas 13:8 Tinkut wib' sa' xb'eeneb' jo' naxb'aanu li tz'uqtz'un naq neke'maq'ek li ral chiru; tint'upiheb' li xch'ool, aran ajwi' tinputz'iheb' jo' naxb'aanu li kaqkoj; ut eb' li k'iche'il xul te'choyoq reheb'.

1 Samuel 1:8,10 Ut laj Elkaná li xb'eelom naxye re: "Ana, k'a'ut naq nakatyaab'ak ut ink'a' nakatwa'ak? K'a' naq ra sa' laach'ool? Ma ink'a' tab'i' q'axal usin chiru lajeeb'aq chi alalb'ej?". 10 K'ajo' xrahil li xch'ool lix Ana! Ki'ok chi yaab'ak ut chi tijok,

Salmos 25:16,17 Chinaawil taxaq ut chawuxtaana wu, xb'aan naq xinkanaak injunes ut q'axal toq'ob' wu. 17 Chakotz taxaq xyot'ik li waanm ut chinaawisi sa' li rahil ch'oolej wankin wi'.

Salmos 34:19 Nach' wank li Qaawa' rik'ineb' li neke'maynak xch'ool: a'an naxkoleb' li maak'a' chik royb'enihomeb'.

Salmos 38:9 tawajenaqin, putz'inp'ilin chinjunxaqalil, aakanin aj chik, ka'aj chik maa na'elk li waanm.

Salmos 55:5 Makach'in naq nayot'e'k li waanm, ninsiksotk kama' tawi' yookin chi kamk;

Salmos 61:3,4 Toj sa' chaq xmaril li ruuchich'och' ninyaab'a laak'ab'a', naq q'axal nayot'e'k li waanm. Chinaab'eres toj sa' xb'een li saqoonak najt xteram,

4 xb'aan naq laa'at nakatmuheelank we; kama'at junaq kab'l li q'axal kaw rib' chiru li xik' na'ilok we.

Salmos 62:9 Kawaq eech'ool rik'in chi junelik, laa'ex li xloq'laj tenamit; tehomaq leech'ool chiru: li Yos a'an li nokoomuhenk wi'.

Salmos 73:26 Us ta lintib'el ut linna'leb' yo chi oso'k, ab'an li Yos nak'ehok xkawub' linch'ool: a'an linsahilal ut linb'ihomal chi junelik!

Salmos 77:3,4 Naq wankin sa' rahilal, ninsik' li Qaawa', ut chi q'eq ink'a' ninhilank chi xye'b'al li wuq' chi elajink; ab'an ink'a' nintaw xk'ojob'ankil li waanm. 4 Ninjic' linch'ool naq najultiko'k we li Yos; k'ajo' naq nayot'e'k li waanm naq yookin chi k'oxlak.

Salmos 86:11 Chak'ut taxaq chiwu laab'e, at Qaawa', re naq tinwanq sa' xyaalal; chak'e taxaq naq junes a'in tinsik': xpaab'ankil ut roxloq'inkil laaloq'laj k'ab'a'.

Salmos 109:22 Q'axal neb'a'in ut jwal toq'ob' wu, ut numtajenaq nayot'nak linch'ool.

Salmos 112:7,8 Ink'a' naxiwak chi rab'inkil li ink'a' usil esilal, xb'aan naq kaw xch'ool, ut k'ojk'o li raanm rik'in li Qaawa'. 8 K'ojk'o li xch'ool ut ink'a' naxiwak, toj toxril chi sache'k eb' li xik' neke'ilok re.

Salmos 143:4 Yo chi lajk linmetz'ew, k'ajo' naq namayok li waanm!

Salmos 147:3 Xk'irtasiheb' li toq'ob'eb' ru ut xb'an chixjunileb' li xtiq'ilaleb'.

Proverbios 14:30 Wi tuqtu laach'ool, kawaq ajwi' laawoq aawuq'; ab'an wi nakatkaqalik, taasachq laayu'am chi junwaakaj.

Eclesiastés 1:13 Rik'in li na'leb' k'eeb'il we xink'e inch'ool chi xpatz'inkil ut xtz'ilinkil rix jo'nimal nak'ulmank sa' ruuchich'och'. Ut xintaw ru a'in: q'axal aal li iiq a'in xk'e li Yos sa' qab'een re tqapaqo!

Eclesiastés 2:10 Jo'nimal naxpatz' linch'ool, maak'a' xinram chiru. Maajun sut ink'a' ta xinb'aanu li k'aru xinrahi ru, xb'aan naq nintaw xsahil li waanm rik'in li nintawasi wi' wib'; ut li sahil ch'ooolej a'in, a'an reeqaj li k'iila k'anjal xinb'aanu.

Eclesiastés 2:22,23 Rik'in a'in nak'utunk naq maak'a' aj e naq naqatawasi qib' ut naqayal qaq'e chi k'anjalak arin sa' ruuchich'och'. 23 Nujenaq li qayu'am chi rahil k'a'uxl ut ch'a'ajkilal. Chi moko chiru q'oqyink nahilank li qach'ool! A'in ajwi' maak'a' rajb'al!

Eclesiastés 11:10 Najtob'resihomaq eerib' rik'in li ookel k'a'uxl ut isihomaq li rahilal sa' leech'ool, xb'aan naq eb' li sahil kutan sa' leesaajilal te'raqe'q sa' junpaat chi maak'a' rajb'al.

Isaías 30:29 Ab'an laa'ex texb'ichanq jo' na'uxk chiru q'oqyink sa' junaq loq'laj ninq'e. K'ajo' naq taasaho'q leech'ool, jo' naq nasaho'k xch'ool junaq poyanam xb'aan xyaab' li xolb' naq naxik sa' li xtzuul li Qaawa', sa' li xmuheb'aal laj Israel!

Isaías 57:15 Xb'aan naq jo'ka'in xyehom li Nimajwal Yos, li nim xwankil, li junelik wank chalen chaq q'e kutan ut li q'axal Sant li xk'ab'a': "Laa'in wankin sa' li na'ajej najt xteram ut jwal loq', ab'anan wankin ajwi' rik'in li ra sa' xch'ool ut li tz'eqtaananb'il, re xk'eeb'al xkawub' xch'ool li kub'enaq xwankil ut li namayok

raanm.

Isaías 65:14 eb' laj k'anjal chiwu te'b'ichanq chi sa sa' xch'ooleb', ut laa'ex teejap eere chi yaab'ak ut chi q'oqonk, chi k'ajo'aq xmay ut xyot'ik leeraanm.

Isaías 66:13,14 Jo' junaq na'b'ej naxq'unb'esi li xk'uula'al, jo'kan ajwi' naq texinq'unb'esi laa'in, ut aran Jerusalén taak'ojob'aaq leech'ool". 14 Naq teeril a'in, q'axal taasaho'q leeraanm ut taak'ulunq wi' chik leech'ool jo' li raxpim. Li Qaawa' tixk'ut li xwankilal sa' xyanqeb' laj k'anjal chiru, ut li xjosq'il taak'utunq sa' xyanqeb' li xik' neke'ilok re.

Jeremías 15:16 Naq xak'e we laawaatin, xink'uleb' chi anchal linch'ool ut xintzeka; a'an tz'aqal nak'ehok xsahil li waanm, xb'aan naq sik'b'il wu aab'aan, at Qaawa', at Nimajwal Yos.

Jeremías 24:7 Tink'e xna'leb'eb' re naq te'xnaw naq laa'in li Qaawa': a'anaqeb' lintenamit ut laa'inaq li xYoseb', xb'aan naq te'sutq'iiq chaq wik'in chi anchaleb' xch'ool.

Juan 14:1 "Misachk eech'ool chi k'oxlak. Chepaab' li Yos ut chineepaab' ajwi' laa'in.

Juan 14:27 "Li tuqtuukil usilal ninkanab' eerik'in, lintuqtuukil usilal nink'e eere; ink'a' nink'e eere kama' naxk'e li ruuchich'och'. Misachk eech'ool chi k'oxlak, chi moko chexxiwaq.

Juan 16:6 Rik'in naq xinye a'in eere, k'ajo' naq xraho'k eech'ool.

Juan 16:22 Jo'kan ajwi' laa'ex ra sa' eech'ool anaqwan, ab'an an tolwil wi' chik eeru ut taasaho'q leech'ool, ut li xsahil eech'ool maa'ani truuq taamaq'oq cheru.

Hechos 2:46 Neke'xk'e xch'ool chi xik sa' rochoch li Yos wulaj wulaj, chi junajeb' xch'ool; neke'xjachi li wa sa' rochocheb' ut neke'tzekank chi saheb' sa' xch'ool ut sa' q'unil.

Romanos 9:2 K'ajo' xrahil linch'ool, junelik namayok li waanm.

2 Corintios 2:4 Relik chi yaal naq xintz'iib'ak eerik'in chi q'axal ra sa' inch'ool: k'ajo' naq xyot'e'k li waanm ut xinyaab'ak! Ab'an an moko re ta xrahob'tesinkil eech'ool naq xintz'iib'ak, re b'an naq teenaw naq numtajenaq raarookex inb'aan.

Efesios 5:19 Naq wanqex chi ch'utch'u, yehomaq saalm, himno ut loq'laj b'ich; chehb'ichanq ut chehwajb'aq chiru li Qaawa' chi anchal eech'ool.